

## De Schriewise van dat Platdüütske

De haugdüütske Schriewise, we mäer un mäer in de platdüütske Schriewise üöwernuomen wät, gait doovan uut, dat de Waodruonen bibehollen wäert. Auk wan sik de Silwengrense ännert, bliw de Waodruone de sölwige. Daorüm sint viële Üörders naidig. In de platdüütske Spraoke gelt düsse Üörders aower nich. So bliw et nich uut, dat et to´n grauten Dwaddel in de Schriewisen kümp. Üm dat an Enne to krigen, döt et sik anbaiden, dat Plat so to schriwen, äs man et häöert. In mien Book is daorüm dat Postament de Silwe, so äs se küert wät, aon de Waodruone ächter Wiäge to laoten. Dat Like kan´m auk in´t Nedersächsiske un in´t Holländske wierfinden. Daomet is män een Koppel van Üörders naidig.

- §1 Dat iärste Waod van´n Sats un Hauptwäöder un Anküerwäöder wäert graut schriewen.
- §2 Postament is de Silwe, so äs se küert wät. Ännert sik de Silwengrense, ännert sik auk de Schriewise.  
Bispiële: Baan = Bahn >> Ba·nen = Bahnen stats Baa·nen; Schien = Schein >> Schi·ne = Scheine stats Schie·ne; Pin = Stift >> Pin·ne = Stifte; plat = flach >> plat·te = flache
- §3 De Waodruone wät nich ächter Wiäge laoten.  
Bispiële: Kuorw = Korb stats Kuorf >> Küör·we = Körbe; Kring = Kreis stats Krink >> Krin·ge = Kreise.
- §4 Wäöder wäert ümmer an de Silwengrense deelt.  
Bispiël: Püüs·ter = Gewehr.
- §5 Dat e to´t Langtrecken wät blaus bi dän Egenluut i schriewen, üm bi handschriewene Wäöder kien Vöwesseln met dat ü to hääben.  
Bispiële: Wien = Wein; mien = mein; liek = gleich.
- §6 Dat h to´t Langtrecken wät nich bruukt.
- §7 Langrockene Egen- un Ümlute wäert an´t Enne van de Silwe eenfak schriewen.  
Bispiële: Ve = Vieh; to = zu; mi = mir; sü = siehe.
- §8 Langrockene Egen- un Ümlute wäert in afsluotene Silwen un an´n Silwenanfang dubbelt schriewen.  
Bispiële: Muul = Maul; uut = aus.
- §9 För sik küerte Egen- un Ümlute wäert eenfak schriewen.  
Bispiële: A·pe = Affe; a·wat = ach was.
- §10 Kuort küerte Egen- un Ümlute wäert eenfak schriewen; daodüör sint dubbelt schriewene Metlute nich naidig.  
Bispiële: Ülk = Iltis; of = ob; düt = dies.
- §11 Dat kwette e wät düör een e met een Trema beliekteekt.  
Bispiële: guët = gut, Rië·kel = männlicher Hund.
- §12 Dubbelt schriewene Metlute in ene Silwe giw et nich.

Met düsse twiälw Üörders laot sik alle platdüütsken Wäöder akkraot schriwen, wan man up de dat Vökläören van de Uutspraoke uppäs.  
Utnaomen sint nich naidig.